

子宗易為朝官。人問宗易之文於絳，絳戲而答曰：蓋代。時人因以蓋代為口實。相見論文，必曰：莫是李三蓋代否？及絳為戶部侍郎也。常侍為本司郎中。因會，把酒請侍郎唱歌，李終不唱而哂之，滿席大噱。（出《嘉話錄》）

閻濟美

閻濟美，前朝公司卿許與定分，一志（明抄本志作忘。）不為，某三舉及第。初舉，劉單侍郎下雜文落；第二舉，坐王（明抄本「王」作「主」。）侍郎雜文落第。某當是時，年已踰踰，常於江激往徑山欽大師處問法。是春，某既下第，又將出關。因獻坐主六韻律詩曰：「謇謇王臣直，文明雅量全。望鉞金自躍，應物鏡何偏。南國幽沈盡，東堂禮樂宣。轉（「轉」原作「輪」，據唐《詩紀事》改。）今游異土，更昔至公年。芳樹歡新景，青雲泣暮天。唯愁鳳池拜，孤賤更誰憐。座主覽焉。問某，今年何者退落？具以實告。先榜落第，座主赧然變色，深有遺才之歎。乃曰，所投六韻，必展後效。足下南去，幸無疑將來之事。某遂出關。秋月，江東求薦，名到省後，兩都置舉，座主已在洛下。比某到洛，更無相知，便投跡清化裡店。屬時物翔貴，囊中但有五緡，策蹇驢而已。有舉公盧景莊已為東府首薦，亦同處焉。僕馬甚豪，與某相揖，未交一言。久乃問某曰：「閻子自何至止？」對曰：「從江東來。」敬奉不敢怠。景莊一旦際暮醉歸，忽蒙問某行第，乃曰：閻二十，消息絕好，景莊大險。某對曰：不然，必先大府首薦。聲價已振京洛，如某遠地一送，豈敢望有成哉？」景莊曰：「足下定矣。」十一月下旬。遂試雜文。十二月三日。天津橋放雜文榜。景莊與某俱過。其日苦寒，是月四日，天津橋作鋪帖經，景莊尋被絀落，某具前白主司曰：「某早留心章句，不工帖書，必恐不及格。」主司曰：「可不知禮闈故事。亦許詩贖。某致詞後，紛紛去留。某又遽前白主司曰：侍郎開獎勸之路，許作詩贖帖，未見題出。主司曰：賦天津橋望洛陽城殘雪詩。某只作得二十字。某詩曰：「新霽洛城端，千家積雪寒，未收清禁色，偏向上陽殘。」已聞主司催約詩甚急，日勢又晚，某告主司，天寒水凍，書不成字。便聞主司處分，得句見在將來。主司一覽所納，稱賞再三，遂唱過。其夕，景莊相賀云：「前與足下並鋪，試蠟日祈天宗賦，竊見足下用魯丘（「丘」原作「血」，據明抄本改）對衛賜。據義，衛賜則子貢也，足下書衛賜作駟馬字，唯以此奉憂耳。」某聞是說，反思之，實作駟馬字，意甚惶駭。比榜出，某濫忝第，與狀頭同參座主，座主曰：諸公試日，天寒急景，寫札雜文，或有不如法。今恐文書到西京，須呈宰相，請先輩等各買好紙，重來請印，如法寫淨送納，抽其退本。諸公大喜。及某撰本卻請出，駟字上硃點極大。座主還闕之日，獨揖前曰：「春間遺（「遺」原作「遣」，據明抄本改）才，所投六韻，不敢慚忘，聊副素約耳。」（出《乾鑿子》）

潘炎

侍郎潘炎，進士榜有六異：朱遂為朱滔太子；王表為李納女婿，彼軍呼為駙馬；趙博宣為冀（「冀」原作「異」，據許本改）定押衙；袁同直入番為阿師；竇常二十年稱前進士，奚某亦有事。時謂之六差。竇常新及第，薛某給事宅中逢桑道茂。給事曰：「竇秀才新及第，早晚得官。」桑生曰：「二十年後方得官。」一坐皆哂，不信。然果耳五度奏官，皆敕不下，即攝職數四。其如命何？（出《嘉話錄》）

令狐峘

大歷十四年改元建中，禮部侍郎令狐峘下，二十二人及第。時執政間有怒薦托不從，勢擬頃覆。峘惶恐甚，因進其私書。上謂峘無良，放榜日竄逐，不得與生徒相面。後十年，門人田敦為明州刺史，峘量移本州別駕，敦始使陳謝恩之禮。（出《摭言》）

熊執易

熊執易通於易義。建中四年，侍郎李紓試易簡知險阻論。執易端座剖析，傾動場中，一舉而捷。（出《國史補》）

[返回 >> 太平廣記 >>](#)

[上一篇](#) [下一篇](#) 本書來源：[開放文學網站](#)